

UNISSA anjur aktiviti meriahkan Bandarku Ceria



REKTOR Universiti Islam Sultan Sharif Ali (UNISSA), Dr. Haji Norarfan bin Haji Zainal ketika ikut serta dalam acara berbasikal Bandarku Ceria.

BANDAR SERI BEGAWAN, Isnin, 6 Februari. - Universiti Islam Sultan Sharif Ali (UNISSA) melalui Bahagian Hal Ehwal Pelajar dengan kerjasama Majlis Perwakilan Pelajar (MPP) telah mengadakan Qiyamullail, Sembahyang Fardu Subuh Berjemaah dan juga Riadah Bandarku Ceria selama dua hari berturut-turut baru-baru ini. Acara Qiyamullail bagi para

mahasiswa yang diadakan pada 4 Februari lalu di Surau Sementara UNISSA itu disemarakkan dengan zikir dan selawat manakala di ruang lain, Auditorium pula diadakan Sesi Perkongsian Ilmu bagi mahasiswi universiti itu.

Di samping itu juga, satu tazkirah bertajuk 'Learning from the Muslimah Warriors' disampaikan oleh mahasiswi Tahun 3, Fakulti Syariah dan Undang-Undang, Dayang Siti Julaiha binti Puasa.

Aktiviti seumpama ini adalah untuk mengetahui kisah dan sejarah sahabat-sahabat yang terdahulu untuk dijadikan contoh teladan yang boleh diaplikasikan dalam kehidupan para mahasiswi.

Pada hari berikutnya pula, para mahasiswa / mahasiswi melaksanakan Sembahyang Fardu Subuh Berjemaah di Jame' 'Asr Hassanil Bolkiah, Kampung Kiarong sebagai salah satu acara program untuk sesama memakmurkan masjid dan menimbulkan rasa kecintaan terhadap masjid.

Acara diteruskan dengan senamrobik yang diketuai oleh Exco Unit Sukan dan Logistik, MPP, Awang Muhamad Ikhwan Syahmi bin Suhaini dan diteruskan dengan aktiviti berbasikal dan berjalan

Siaran Akhbar dan Foto :
Universiti Islam Sultan Sharif Ali



ACARA Qiyamullail bagi mahasiswa yang diadakan di Surau Sementara UNISSA.

kaki menuju ke Taman Haji Sir Omar 'Ali Saifuddin dalam rangka memeriahkan suasana aktiviti Riadah Bandarku Ceria, di samping untuk mengamalkan cara hidup sihat dalam kalangan warga UNISSA agar lebih aktif secara mental dan fizikal.

Turut hadir dalam aktiviti berkenaan ialah Rektor UNISSA, Dr. Haji Norarfan bin Haji Zainal; Timbalan Rektor, Penolong Rektor, Dekan Hal Ehwal Pelajar dan beberapa pegawai dan kakitangan UNISSA.

Bandarku Ceria lebih meriah apabila

para mahasiswa / mahasiswi UNISSA telah membuka laluan kepada para pengunjung dengan mengadakan Klinik Surah Al-Fatihah bagi membantu orang ramai memperbaiki dan menghalusi lagi bacaan Surah Al-Fatihah agar setiap ayat dapat dibaca dengan betul dan menepati makna sebenar.

Pada masa yang sama juga, Photohunt Race turut diadakan di antara mahasiswa / mahasiswi UNISSA agar dapat mengeratkan persaudaraan dan perpaduan antara warga UNISSA.



KLINIK Surah Al-Fatihah bagi membantu orang ramai memperbaiki dan menghalusi lagi bacaan Surah Al-Fatihah agar setiap ayat dapat dibaca dengan betul dan menepati makna sebenar.

Pengeluaran sekuriti Sukuk Al-Ijarah jangka pendek

Siaran Akhbar :
Autoriti Monetari Brunei Darussalam

BANDAR SERI BEGAWAN, Isnin, 6 Februari. - Autoriti Monetari Brunei Darussalam (AMBD) sebagai ejen bagi Kerajaan Kebawah Duli Yang Maha Mulia Paduka Seri Baginda Sultan dan Yang Di-Pertuan Negara Brunei Darussalam dalam mengurus serta mentadbir pengeluaran Sukuk Al-Ijarah dengan ini mengumumkan penentuan kadar pengeluaran sekuriti Sukuk Al-Ijarah jangka pendek Ke-142.

Menurut Siaran Akhbar AMBD, jumlah pengeluaran sukuk sebanyak BND100 juta adalah seperti berikut :

Bagi Siri Ke-142, tarikh pengeluaran adalah pada 2 Februari 2017, sementara tarikh matang pada 4 Mei 2017. Manakala tempoh adalah 91 hari dan kadar sewa pula 0.6250 peratus.

Dengan pengeluaran tersebut, Kerajaan Brunei setakat ini telah mengeluarkan lebih BND10.6282 bilion nilai sekuriti Sukuk Al-Ijarah jangka pendek, sejak tawaran pertama pada 6 April 2006, dan baki tertunggak pegangan jumlah Sukuk Kerajaan Brunei sehingga 2 Februari 2017 berjumlah BND513.2 juta.

TAIB pelawa hadiri Ceramah Perdana dan Kuliah Subuh

Oleh : Dk. Vivy Malessa Pg. Ibrahim
Foto : Dk. Nur Hafilah Pg. Osman

BANDAR SERI BEGAWAN, Isnin, 6 Februari. - Perbadanan Tabung Amanah Islam Brunei (TAIB) akan mengadakan dua acara bersempena dengan Sambutan Jubli Perak TAIB Ke-25 pada 10 Februari nanti.

Ketua Jabatan Kewangan, TAIB, Dayang Zamzaipa binti Haji Ismail mengumumkan perkara tersebut dalam sidang media yang berlangsung di Bilik Korporat TAIB, di sini.

Jelasnya, salah satu acara itu adalah Kuliah Subuh pada jam 6.15 pagi bertempat di Jame' 'Asr Hassanil Bolkiah.

Sementara acara kedua pula ialah Ceramah Perdana yang akan berlangsung di Stadium Tertutup,

Kompleks Sukan Negara Hassanil Bolkiah, Berakas pada jam 8.00 malam.

Dayang Zamzaipa menjelaskan, Kuliah Subuh dan Ceramah Perdana tersebut akan dikendalikan oleh penceramah jemputan dari Malaysia, Ustaz Don Danyial bin Don Biyajid.

Penceramah khas yang tidak asing dalam dunia dakwah itu akan membawakan ceramah bertajuk 'Rezeki dan Hutang' semasa Kuliah Subuh, sementara semasa Ceramah Perdana itu nanti Ustaz Don Danyial akan mengupas perkara yang berkaitan dengan tajuk 'Jutawan Akhirat'.

Selain itu katanya, Ceramah Perdana itu nanti juga akan diserikan dengan

ceramah soleh corang penceramah jemputan tempatan, Awang Haji Khairul Nazif bin Haji Damit.

Sehubungan itu, terangnya, pihak TAIB akan memberikan tiket percuma kepada orang ramai yang berminat bagi menghadiri Ceramah Perdana malam itu nanti.

Beliau seterusnya menambah, tiket-tiket tersebut akan diberikan pada 8 Februari di beberapa cawangan TAIB iaitu TAIB Bandar Seri Begawan; TAIB Kuala Belait; TAIB Tutong; TAIB Temburong; Platinum TAIB dan Pusat Pembiayaan TAIB di Airport Mall.

Tiket-tiket berkenaan juga boleh didapati selepas Kuliah Subuh pada hari itu juga.

PEGAWAI dari Perbadanan Tabung Amanah Islam Brunei (TAIB) semasa sidang media yang berlangsung di Bilik Korporat TAIB.

